

**Inatsisartut ataatsimiittarfianni ataatsimiinnerit, siumut aalajangersarneqareersumik annertussusilimmik, radiukkut aallakaatinneqartarnissaannik KNR-ip pisussaaffilerneqarnissaannik sulissuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**  
(Siulittaasoqarfimmut ilaasortat)

### **Akissuteqaat**

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

### **Aappassaaneerpeqarnera**

Naalakkersuisut Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliaq isumaliutissiissutaanut qutsavigaa.

Ataatsimiititaliap siunnersuut saqqummiunneqartoq qanoq paasineqartariaqarnersoq sunillu sunniuteqassanersoq isumaliutissiissummini erseqqissaateqarfigaa. Ataatsimiititaliap ilaatigut erseqqissaatigaa siunnersuut radiukkut toqqaannartumik aallakaatitsisarnissamik piumasaaqateqanngitsoq.

Ataatsimiititaliaq allannguutissatut siunnersuummik saqqummiussivoq nuna tamakkerlugu Inatsisartut ataatsimiittarfianniit ataatsimiinnerit aalajangersimasumik annertussusilikkamik aallakaatinneqartarnissaat qulakkeerniarlugu Naalakkersuisut suliniuteqaqqullugit peqquneqassasut. Tassunga atatillugu Ataatsimiititaliap oqaatigaa Naalakkersuisut taamaallaat peqquneqassasut tatiginartumik sulissasut nuna tamakkerlugu Inatsisartut ataatsimiittarfianni ataatsimiinnerit aallakaatinneqartarnissaat qulakkeerniarlugu.

Naalakkersuisut allannguutissatut siunnersuut tunngavilersorluakkatut isigaat siunnersuutillu suliarineqarnerani qulequttap taasissutigineqartussap allanngortinneqarsinnaanerani nalilersuinissamik Naalakkersuisut kaammattuutaanut naapertuulluarluni taamaalilluni assigiinngitsunik aaqqiissuteqartoqarsinnaanera ammaanneqarluni. Tamanna tunuliaqutaralugu Naalakkersuisut ilaliipput.

Taamatut oqaaseqarnikkut Naalakkersuisut inassutigaa ataatsimiititaliap allannguutissatut siunnersuutaa akuersissutigineqassasoq.